

industrijskih proizvoda primijeni na nabavnu i ispravku vrijednosti, odnosno na ranije revalorizovane vrijednosti.

(4) Efekti revalorizacije knjiže se na izvore sredstava.

(5) Revalorizacija potraživanja i obaveza vrši se u skladu s ugovorom, a to znači da se, ako revalorizacija glavnice nije ugovorena, dio kamate, odnosno dividende koji predstavlja prinos do visine rasta cijena na malo smatra efektom revalorizacije.

(6) Indekse promjena cijena objavljuje Agencija za statistiku BiH.

## POGLAVLJE VI. POPIS IMOVINE, OBAVEZA I POTRAŽIVANJA

### Član 56. (Popis)

(1) „RGFBD“ najmanje jedanput godišnje usklađuje stanje sredstava i izvora sredstava iskazanih u knjigovodstvu sa stvarnim stanjem utvrđenim popisom.

(2) Popis – inventura vrši se obavezno jednom godišnje sa stanjem na dan 31. decembra svake godine, a može se po potrebi izvršiti i vanredni popis zbog statusnih promjena ili zbog drugih vanrednih okolnosti koje su mogle izazvati promjene na stanju imovine.

(3) Popisom se utvrđuje stvarno stanje stvari, materijalnih prava, potraživanja i obaveza na dan 31. decembra tekuće godine.

(4) Prije popisa neophodno je izvršiti usklađivanje podataka iz pomoćnih knjiga s podacima iz glavne knjige.

### Član 57. (Popisne komisije)

(1) Popis vrši komisija koju imenuje Upravni odbor „RGFBD“.

(2) Popisna komisija sačinjava izvještaj o stvarnom stanju imovine i zapisnik s preporukama dostavlja Upravnom odboru „RGFBD“ na razmatranje i usvajanje.

(3) Preporuke moraju sadržavati:

- način likvidacije utvrđenih manjkova,
- način knjiženja utvrđenih viškova,
- visinu otpisa nenaplativih potraživanja i zastarjelih potraživanja,
- način eliminisanja stalnih sredstava, sitnog inventara i materijala koja su rashodovana s prijedlogom da li izvršiti prodaju putem javne licitacije, pokloniti nevladinim udruženjima ili predati na otpad.

(4) Upravni odbor „RGFBD“ razmatra i usvaja izvještaj o stvarnom stanju imovine utvrđenim popisom te donosi odluku o preporukama popisne komisije.

## DIO TREĆI – PRELAZNE I ZAVRŠNE ODREDBE

### Član 58. (Stavljanje van snage)

Stupanjem na snagu ovog pravilnika stavlja se van snage Pravilnik o knjigovodstvu i računovodstvu

„RGFBD“ broj 280/15 od 30.12.2015. godine, Pravilnik o izmjeni Pravilnika o knjigovodstvu i računovodstvu „RGFBD“ broj 189-2/16 od 26.01.2017. godine i Pravilnik o izmjeni i dopuni Pravilnika o knjigovodstvu i računovodstvu „RGFBD“ broj 143/17 od 18.12.2017. godine.

### Član 59.

#### (Stupanje na snagu i primjena)

Ovaj pravilnik stupa na snagu osmoga dana od dana objavljivanja u „Službenom glasniku Brčko distrikta BiH“, a primjenjivaće se od 01.01.2019. godine.

Broj: 215/18  
Brčko, 20.12.2018. godine

**Predsjednik Upravnog odbora:**  
Miralem Kovačević, dipl.oec., s. r.

## 19

Upravni odbor Fonda zdravstvenog osiguranja Brčko distrikta BiH, na osnovu člana 13 stav 1, tačke f) Statuta Fonda zdravstvenog osiguranja Brčko distrikta BiH (Službeni glasnik Brčko distrikta BiH, brojevi: 17/07, 1/08, 3/15, 7/15, 41/16, 42/17 i 50/18) i člana 37 stava 3 Zakona o zdravstvenom osiguranju Brčko distrikta BiH – prečišćeni tekst (Službeni glasnik Brčko

distrikta BiH, broj 27/18), na 22. redovnoj sjednici, održanoj 12. 12. 2018. godine, donosi

## ODLUKU

### O NAJVIŠEM I NAJNIŽEM IZNOSU NAKNADE PATE

#### Član 1

Ovom odlukom utvrđuje se najviši i najniži iznos naknade plate zbog privremene spriječenosti za rad osiguranika Fonda zdravstvenog osiguranja Brčko distrikta BiH preko 42 dana, za 2019. godinu.

#### Član 2

Najviši iznos naknade plate koju Fond zdravstvenog osiguranja Brčko distrikta BiH refundira poslodavcu za svakog zaposlenika, za vrijeme privremene spriječenosti za rad, preko 42 dana, utvrđuje se u iznosu od 1.000,00 KM.

#### Član 3

Najniži iznos naknade plate utvrđuje se u visini minimalne plate za mjesec za koji se naknada obračunava prema propisima entiteta BiH koji se primjenjuju u 2019. godini.

#### Član 4

Iznosi utvrđeni ovom odlukom su parametri za obračunavanje novčanih naknada u skladu s poglavljem b) Novčane naknade (članovi od 32 do 39) Zakona o zdravstvenom osiguranju Brčko distrikta BiH.

#### Član 5

Ova odluka stupa na snagu danom donošenja i objavljuje se u Službenom glasniku Brčko distrikta BiH.

Broj: 015-180/7-UO-116/18  
Brčko, 12. 12. 2018. godine

**PREDSJEDNIK UPRAVNOG ODBORA**  
dr. med. sc. Zoran Tošić, s. r.

## 20

Konkurencijsko vijeće Bosne i Hercegovine, na osnovu člana 25. stav (1) tačka e), člana 42. stav (1) tačka d), a u vezi sa čl. 12., 14., 16., 17. i 18. Zakona o konkurenciji («Službeni glasnik BiH», br. 48/05, 76/07 i 80/09), rješavajući po Prijavi koncentracije privrednog subjekta Hisense Group Co., Ltd, Hisense Building, Donghai West Road br. 17, Shinan Okrug, Qing Dao, Narodna Republika Kina, zastupanog po advokatu Naidi Čustović, Zmaja od Bosne 7/III, 71000 Sarajevo, zaprimljenoj dana 14.06.2018. godine pod brojem: UP- 03-26-1-017-1/18, na četrdesetoj (četrdesetoj) sjednici održanoj dana 14.11.2018. godine, je donijelo

## RJEŠENJE

- Ocjenjuje se dopuštenom koncentracija na tržištu prodaje velikih i malih kućanskih aparata, kuhinjskih aparata i klima u Bosni i Hercegovini koja će nastati sticanjem kontrole privrednog subjekta Hisense Group Co., Ltd nad privrednim subjektom Gorenje gospodinjski aparati d.d., kupovinom (..) <sup>1</sup> % dionica.
- Ovo Rješenje o koncentraciji se upisuje u Registar koncentracija.
- Ovo Rješenje je konačno i bit će objavljeno u «Službenom glasniku BiH», službenim glasilima entiteta i Brčko distrikta Bosne i Hercegovine.

## O b r a z l o ž e n j e

Konkurencijsko vijeće je zaprimilo, pod brojem: UP-03-26-1-017-1/18 dana 14.06.2018. godine, Prijavu koncentracije (u daljem tekstu: Prijava) privrednog subjekta Hisense Group Co., Ltd, Hisense Building, Donghai West Road br. 17, Shinan Okrug, Qing Dao, Narodna Republika Kina (u daljem tekstu: Hisense Group ili Podnosilac prijave), zastupanog putem advokata Naide Čustović, Zmaja od Bosne 7/III, 71000 Sarajevo, kojom isti namjerava steći

<sup>1</sup> (..) – podaci predstavljaju poslovnu tajnu